

muratione & contradictione, ut etiam loco ignominiosam nomenclationem induxerint neq; hodie (*) deletam; in ipsam quoq; regionem, quam propter foedam idololatriam incolis primævis vacuefactam toties audierant, ingressi eandem tamen repetentes longè tertiùs exercebant: Tamen verò salvavit eos, petitis ipsorum annuit, ingluviem saturavit, indignationem & excisionem retraxit, multis vicibus liberationem repetijt, afflictiones ipsorum æstumavit, orationem exaudijt, juramenti ac foederis sui recordatus pœnituit, & pro immensâ suâ misericordiâ in gratiam recepit. Quia ergò salvos eos toties fecerat, & ex varijs nationibus captivos & vagatos collegerat, meritò confitebantur Nomini ipsius sancto, & gloriabantur in laude ejus, dicentes: *Benedictus Dominus Deus Israël à seculo usq; in seculum.* Et dicat omnis populus, Amen, Hallelujah!

Deniq; *Psalmus*, in hâc quidem classe & dispositione nostrâ, *ultimus* continet & præscribit orationem Eucharisticam *sextuplici*, si B. Lutherum sequimur, *hominum afflictorum generi*, cui elegantissimè non unâ vice interseritur *versus*, uti vocant Veteres, *intercalaris*, videlicet vv. 8, 15, 21, 31: *Prima* ergò *classis* est eorum, quos Deus fame sitiq; periclitatos & victus quærendi causâ oberrantes ab erroribus solitudinum liberavit & ad mansiones hominum reduxit. *Secunda* horum, qui, cum scelera propter & flagitia sua manicis pedicisque constricti in squalidis carceribus attinerentur, ad Deum clamantes fuerunt liberati. *Tertia*, qui iisdem ex causis lecto letali affixi usq; ad portas mortis pertigerant, sanitati tamen & vitæ diuturniori fuerunt restituti: ubi per missionem *Verbi* nonnulli intelligunt *nutum* seu *voluntatem Dei*, non absurdè tamen & rectiùs indicari dixerimus *Λόγον* sive *Filium Dei*, qui est noster Medicus, qui sanat omnes languores nostros atq; infirmitates: Et sic reddidit quoq; b. l. & v. 25. Targum

(*) Par est ratio *μοσχολατρεία*, de quâ Moses Gerundensis, *Non est tibi, Israël, ultio, in quâ non sit uncia de iniquitate Vituli*, citante Paulo Fagio & B. Luthero im Briefe wider die Sabbater Tom. VII. Jen. S. Etliche ihrer Rabinen &c.